

Protocol dalla radunanza generala
dall'Uniun Rumantscha Grischun Central (URGC),
igls 14-05-2018, allas 20.30, an scola primara Donat

preschaintAs: 27 persungas inclus giasts

stgisos/adas: Petra Uffer, Pia Plaz, Gion Cola, Beat Jenal, Sascha Pittet, Pauli Dosch, Pol Dosch, Dorathe Dolf, Sascha Janutin, Daniel Dedual, Sandra Baltermia-Guetg, Aron Moser, Gian Michael, Carmen Dedual

1. Bavagnaint

La presidenta, Zegna Pittet-Dosch, benevainta tot igls preschaints cordialmaintg. Ella fò ena curta survista digl tema latent; las medias rumantschas.

2. Elecziun d'en dombravouschs

Filip Dosch vign proponia ed eligia.

3. Approvar igl protocol dalla davosa radunaza generala

Igl protocol è nia tarmess cun l'invitaziun. Angraztgond vign el approvo cun gronda maioritad.

4. Approvar igl rapport da gestiun 2017 (publitgia ainten la Revista digl noss Sulom 2018)

Igl rapport annual è sto publitgia ainten la Revista digl noss Sulom 2017. Zegna menziunescha curtamaintg igls codeschs d'ameis tgi l'uniun ò regalo an differentas scolettas e scolas digl noss intschess. Nous vagn er sustignia la gruppa rumantscha da giuier an Val Schons. Igl 2017 vainsa er instrado la midada digls noms dallas fermadas dalla posta an Surses. Chegl vo an vigour igl 2018.

Igl rapport vign approvo per ena vusch, cun igl gaveisch da publitgier igl rapport er ainten La Quotidiana.

5. Approvar igl rendachint 2017 ed igl rapport digls revisours

Marc Decurtins preschainta igl chint digl onn 2017. Igl chint sera cun en surple da CHF 13'226.16. La somma da bilantscha monta a CHF 91'113.10. Igl rapport digls revisours preligia Magnasch Michael. El propona d'approvar igl rendachint e da discarger la suprastanza. Chegl succeda cun 22 vuschs.

6. Elecziuns

- Dorathe Dolf ò demissiuno. Giulia Riethauser surpeglia igl post an suprastanza. Ella vign eligia per acclamaziun.
- Plasch Barandun igl giuven vign ramplazzo antras Gian-Marco Beeli scu suppleant da suprastanza.
Zegna angraztga a Dorathe per lour angaschamint e surdat en pitschen regal da cumgio alla mamma da Dorathe. Ella angraztga zont fitg.

7. Nominaziun represchentant ainten la suprastanza dalla LR

Igl sotsignia sa metta a disposiziun per en'ulteriour trieni. Er el vign eligia.

8. Fixar igl program d'activitad 2018

Fegnameiras pigl onn 2018

- Edeir annualmaintg la Revista digl noss Sulom
- Carnets da liger per scholars tgi amprenan a liger, rg e sutsilvan
- Edeir igl codesch d'ameis (restampa)
- Cuntinuar cun acziuns spezialas per unfants dalla prescola/scoligna
- Dislocar igl archiv communabel cun l'URS
- Observar e sustignair igl svilup digl rumantsch

Fegnameiras permanentas

- Formular giaveischs per mangs dalla Leia Rumantscha
- Sustignair e promover inscripziuns rumantschas

Johann Clopath less tgi er las inscripziuns dallas veias an Val Schons vigna fatgas an rumantsch.

Reto Capeder menziunescha tgi mantga en post per las inscripziuns. Aint igl Sid funcziunescha chegl er. Tgi è responsabel digl cantun?

Romano Plaz è fitg angaschea an divers temas. El angraztga alla suprastanza per la sia labour. An spezial a Zegna. Gl'è bel tgi la posta benevainta ossa per rumantsch. Mademamaintg less el sustignair l'ideia da Reto Capeder.

Da nov dattigl tavlas per mintga vischnanca tgi dattan en'invista ainten la veta an las vischnancas avant la fusiun. El angraztga agl cumegn da Surses tg'ò pussibilito da far chegl.

Igl program da labour vign approvo cun gronda pluralitad.

9. Approvar igl preventiv 2018

Igl cassier, Marc Decurtins, preschainta igl preventiv tgi prevei antradas da 58'500 francs e sorteidas da 54'000 francs. Igl preventiv vign approvo cun gronda pluralitad, er sch'el prevei en pitschen deficit.

10. Fixar las contribuziuns annualas 2018

Las contribuziuns da commembers, tgi montan a CHF 30.- per singuls, CHF 50.- per conjugals, per collectivs e persungas giuridicas, restan scu anfignen adaco.

11. Rapport Lia Rumantscha

Johannes Flury admetta en cordial angraztgamaint all'Uniun rumantscha dalla Sutselva scu er all'Uniun Rumantsch Grischun Central.

100 onns LR: Cumegns tg'on interess dad esser ospitant dastgan anc s'annunztgier.

Medias rumantschas: La LR è cuntainta da santeir l'idea digls commembers. Mademamaintg ins vegia ossa er la resoluziun dalla Sotselva. Igl detta er dad otras regions giaveischs. Pero simplamaintg uscheia dettign betg milliuns da Berna.

Pertutgont las tavlas cunseglija Johannes tg'igl uffezi da cultura vegia da far rughel. Igl cantun è sez responsabel. La Lia è betg l'istanza da reclamaziun.

12. Varia

La pressa rumantscha caschungia discussiuns. I dat vuschs per las gasettas existentas scu er per integrar la PdS an La Quotidiana. La Quotidiana ò grond sustign an Val Schons. La retschertga dalla LR vign crititgeida. La LR duess eir giu Berna per raps per la pressa rumantscha.

Pianavant vign constato, tgi l'URGC communitgescha betg avonda las activitads. Zegna declera tgi l'URGC ò fatg diversas communicaziuns da pressa.

Zegna angraztga agl team digl noss Sulom, agls consuprstants ed alla Leia.

Fegn dalla radunanza allas 22.08

Casti, matg 2018

Gion Capeder